

Quinta Urbs

H O A I K I N G.

Hoaiking urbs exiguum quidem habet territorium, aer ibi tamen mitis ac salubris est, agerque fertilis: ad Boream à montibus, in Australi parte à Croceo clauditur, in eo sex sunt civitates, 1 Hoaiking, 2 Ciyüen, 3 Sievúú, 4 Vuché, 5 Meng, 6 Ven. in Yvi Imperatoris divisione hic tractus ad Ki Provinciam pertinet, sub constellationibus Xe & Pi, Xanga Imperatoria familia Kinui, Cheva Sanyven dixerunt. Regum tempore tum Guei, tum Quei, tum Ching nomen habuit, Cina familia Sanchuen vocavit, Hana Honui, T'anga Hoaicheu, Taiminga Hoaiking, in qua ex eadem familia Rex habitare solebat, unde nobilis ac dives censebatur urbs. Fana illustriora habet tria. medicamenta rara profert, quæ reliquis provinciis suppeditat.

*Nomen
anti-
quum.*

Ciyüen civitatis fossa variorum etiam animalium vivarium est: ibidem nobile ædificium, Yehiang dictum, in memoriam viri illius, qui cum uxor ducenda esset, ita cœlum orasse fertur: non peto divitias, nec voluptates, neque idcirco uxorem ducere volo, sed tantum probos opto filios; tresque ex ea suscepit, qui omnes doctissimi evasere Philosophi & Præfecti.

Montes.

Ad Boream urbis mons Tai est, hic olim ingenti boatu emissio disruptus est, & cavernam aperuit trecentarum perticarum, ex qua aqua emanat bituminosa, crassa ac pinguis, adeo ut loco olei in multis adhiberi possit, saporis est haud ingrati.

Vanguo mons palatium refert sylvis ac arboribus vestitum, hic Ciyüen vicinus est.

Flumina.

Ki amnis in Vanguo monte originem habet, inde sub terra occultatur, mox lacum Taye efformat, ex illoque promanans Ci amnis dicitur.

Sexta Urbs

H O N A N.

Commune huic urbi cum tota Provincia nomen, ad occasum Metropolis jacet in Boreali ripa fluminis Co: Hanc Sinæ centrum, seu umbilicum, ut vocant, mundi esse volunt, quia in meditullio Sinæ est, regio circumjacens montibus abundat, amœnitate tamen ac ubertate re-

rum multis nihil omnino cedit. urbs ipsa ingens est ac incolis frequens Regem è Taiminga habuit familia; tredecim nobilissima fana numerat heroibus erecta, quorum unum supra fluvium Co est, ad orientalem urbis partem, sub quo fluvius tamquam sub pontis fornice præterfluit. Sungæ Imperatoris familiæ auctorem Sinis dedit. Yvus Imperator hunc terræ tractum Yü Provinciam adscripsit sub constellatione Mao, atque hic Vüs Imperator, cum Xangæ familiæ bellum inferre cogitaret, arma ac reliqua omnia adornavit. Cina familia Sanchuen dixit, quod tres aquas significat, nam revera Urbs jacet inter tria flumina: hodiernum nomen ab Hana familia est, ad hanc è Borealibus partibus ejecta confugit, in eaque non diu duraturam Imperatoriam fixit sedem, Rex Guei Cocheu, T'anga familia Tungtu, Sunga Siking, Kina Kinchang dixit, at Taiminga Honan nomen restituit: habet sub se civitates quatuordecim, quarum 1 Honan, 2 Jenfu, 3 Cung, 4 Mengcin, 5 Yyang, 6 Tengfung, 7 Jungning, 8 Singan, 9 Mienchi, 10 Cao, 11 Xen, 12 Lingpao, 13 Xeuhiang, 14 Luxi.

Ex hisce Tengfung non ita celeri pede ac calamo percurrenda, quippe quam item in ipso orbis centro ac meditullio constituunt Sinæ, in ea spectatur etiamnum ingens regula supra æneum planum ad perpendicularum erecta in certas divisa partes, uti & in ipsa plani superficie linea extensa in suas etiam partes distributa, quo instrumento Cheucungus magnus ille apud Sinas Astrologus & Mathematicus, summusque totius olim Imperii præfectus, umbram meridianam observabat, atque inde altitudinem poli, cæteraque quæ ex ea colligi possunt, venabatur. Vixit is ante Christum natum annis mille, centum & viginti: ibidem visitur turris, in qua solitus syderum notare cursus ac conversiones, dicta Quonsing tai, hoc est aspiciendorum syderum turris, hic idem Cheucungus acus pyxidisque magneticæ usum jam tum habuit familiarem, uti clarius demonstro in mea Sinensium Historiarum epitome.

*Schioterica, poli
altitudo,
usus mag-
netis an-
tiquissi-
ma apud
Sinæ.*

Habet hic terrarum tractus quam plurima ac magnifica sepulchra, & circum ipsa urbis mœnia pulcherrima viridaria, vivariaque multa: prope Xen civitatem in magno quodam fano duodecim statuarum suis basibus innixæ conspiciuntur, jam inde à Xio Imperatore mirando ac plane raro fusæ artificio.

Pe mang mons ingens ad Boream urbis, inde

Montes,